

গীতাঞ্জলি

১১

কোথায় আলো কোথায় ওরে আলো !
বিরহানলে জ্বালো রে তা'রে জ্বালো ।
রয়েছে দীপ না আছে শিখা
এই কি ভালে ছিল রে লিখা,
ইহার চেয়ে মরণ সে যে ভালো ।
বিরহানলে প্রদীপখানি জ্বালো ।

বেদনা দূতী গাহিছে “ওরে প্রাণ,
তোমার লাগি জাগেন ভগবান ।
নিশীথে ঘন অন্ধকারে
ডাকেন তোরে প্রেমাভিসারে,
দুঃখ দিয়ে রাখেন তোর মান ।
তোমার লাগি জাগেন ভগবান ।”

গগনতল গিয়েছে মেঘে ভরি ;
বাদল জল পড়িছে ঝরি ঝরি ।
এ ঘোর রাতে কিসের লাগি
পরাণ মম সহসা জাগি
এমন কেন করিছে মরি মরি ।
বাদল জল পড়িছে ঝরি ঝরি ।

গীতাঞ্জলি

বিজুলি শুধু ক্ষণিক আভা হানে,
নিবিড়তর তিমির চোখে আনে ।

জানি না কোথা অনেক দূরে
বাজিল গান গভীর সুরে,
সকল প্রাণ টানিছে পথ পানে ;
নিবিড়তর তিমির চোখে আনে ।

কোথায় আলো কোথায় ওরে আলো !
বিরহানলে জ্বালো রে তা'রে জ্বালো ।

ডাকিছে মেঘ, হাঁকিছে হাওয়া,
সময় গেলে হবে না যাওয়া,
নিবিড় নিশা নিকষ-ঘন কালো
পরাণ দিয়ে প্রেমের দীপ জ্বালো ॥

আষাঢ়, ১৩১৬ ।